

INUIT ATAQATIGIIT

INATSISARTUNI



Nuuk, 6. juni 2014

Inatsisartut Suleriaasianni § 37 naapertorlugu siusinaartumik pensionisiaqarnerup iluani aqqissuusseqqinniarnermut pilersaarutaasumut Naalakkersuisunut imaattunik apeqquteqarpunga.

(Inatsisartunut ilaasortaq Naaja H. Nathanielsen, Inuit Ataqtigiit)

Apeqqutit:

1.

Naalakkersuisut ilimasaarutigivaat "Aningasat tunniunneqartartut assigiingitsut" siusinaartumik pensionisiallit aqqissuusseqqinnerannut ilaassasut.

- A) Siunissami siusinaartumik pensionisiallit qanoq immikkuutitaarneqassappat?
- B) Aningasat qanoq annertutigisut pissarsiarinissaannut killilersuutit suut atorneqassappat?

2.

Naalakkersuisut siusinaartumik pensionisialinnik "suliassaqartitsinerorusuput". Taamatut oqarnermi sunarpiaq pineqarpa?

3.

Naalakkersuisut naamminneq oqaatigivaat "suliassaqartitsinerit" tassaasinaasut pikkorissarnerit ilinniaqqinnerillu. Pineqartut taakkua suliassaqartitseriaatsip suusinnaanerinit tamakkiisumik suussusersinerunerlutik, imaluunniit allatigutaaq suliassaqartitsisoqassava?

4.

Naalakkersuisut ilimasaarisimapput pingaartumik siusinaartumik pensionisiallit inuusunnerusut suliassaqartinneqassasut tamannalu inuuniarnikkut qaffassasumik kinguneqassasoq nalilerlugu.

- A) Tassa imaannerpa taava siunissami sulisinnaassuseq peqqissut-sikkullu inissisimaneq killilersuutaanatit suliassaqartinneqarnissamat qanoq utoqqaatigineq killilersuutaassasoq.
- B) Siusinaartumik pensionisiallit suliassaqartinneqartut suliassaqartinneqangitsunut naleqqiullutik annertunerusunik aningaasaqartinneqassappat?
- C) Suliassaqartinneqarnissamat peqataasinnaangikkaanni imaluunniit peqataanissaq kissaatiginngikkaanni taava siusinaartumik pensionisialik aningaasatigut pillarneqassava?
- D) Siusinaartumik pensionisiallit suliassaqartinneqartussaangitsut inuuniarnikkut qanoq qaffassaavigineqassappat?

5.
Naalackersuisut oqaatigivaat "Sumi najugaqarneq apeqqutaatinnagu siusinaartumik pensionisiallit assigiimmik pineqartarnissaat" aqqissusseqqinnermi ilaatinneqassasoq. Tamanna itisileqquneqarpoq.

- A) Ullumikkut sumi najugaqarneq aallaavigalugu sutigut assigiinngisitsisoqarpa?
- B) Nuna tamakkerlugu siusinaartumik pensionisiallit assigiinnik atuqalernissaat siunissami qanoq qulakkeerniarneqarpa?
- C) Suliassaqartitsinerup sumiiffikkaartumik pisinnaanera Naalackersuisunit naatsorsuutigineqarpa, imaluunniit suliassaqartitsinerit ilaanni najugaq qimallugu suliartortoqartassava?

6.
Maannakkut siusinaartumik pensionisiallit qassit siunissami suliffeqarnermut akuunissaat qanoq naatsorsuutigineqarpa, tamakkiisumik ilaannakortumillu sulinissanut agguataarlugit.

- A) Suliffiit qanoq ittut pingaartumik eqqarsaatigineqarpat?
- B) Qajassuuttariaqartunut suliassiissutit ilaannakortumillu suliffiisinnaasut amerlinissaat pillugit suliffeqarnermi peqataasunut oqaloqatigiissutigineqarsimanerlutik?

7.
Naalackersuisut siusinaartumik pensionisiallit sulisinnaassutsimikkut naliliivigineqaqqinnissaat ilimasaarutigivaat.

- A) Naliliivigineqaqqinnissaq sumik imaqarpa?
- B) Sulisut sorliit, fagpersonit, nalileeqqinnissami peqataatinneqasappat?
- C) Suliaq tamanna qaqugu naammassineqartussatut naatsorsuutigineqarpa?
- D) Maannakkut siusinaartumik pensionisiallit tamarmik naliliivigineqaqqissappat?

8.
Ukua eqqarsaatigalugit siusinaartumik pensionisialinnut aqqissusseqqinnermut Naalackersuisut qanoq anguniagaqarpat

- A) Inuiaqatigiinni aningaasaqarnerup iluani?
- B) Suliffiit aalaakkaasut amerlassusissaannut tunngasutigut?

9.
Siusinaartumik pensionisiallit ilinniaqqitsitat suliassaqartitallu suliffissaleqisunut ilanngutinnginnissaat eqqarsaatigalugu Naalackersuisut qanoq qulakkeerinninniarpat?

Tunngavilersuut:

Naalackersuisut siusinaartumik pensionisialinnut aaqqissuusseqqinnissamik pilersaaruteqarput. Paasinninnera naapertorlugu aaqqissuusseqqinnissami siusinaartumik pensionisiallit siunissami ikilisinneqarnissaat maannalu siusinaartumik pensionisiallit amerlanerit suliffeqarnermut uternissaat siunertaapput.

Siusinaartumik pensionisialinnut aaqqissuusseqqinnissap pisariaqartinneqarnera qularutissaanngilaq, aaqqissuusseqqinnerli siusinaartumik pensionisiallit suli maannamiit avataaniinnerulernissaannik, aningaasaqarnikkut inuttullu, kinguneqassanngilaq.

Apeqqutit ullut suliffiusut qulit iluanni akineqarnissaat kissaatigaara.